



雞仔毋見忒

師傅話講「十隻雞仔毋見忒九隻——一看就知」。該兩隻雞仔毋見忒兩隻咧？當鬧熱哦！歸莊頂仔人嘍嘍嘶嘶「麼人个雞仔恁會飛？在茶園頂飛了！」係嘢！該兩隻雞仔當會飛，飛歸丈仔高，飛上茶園，還在茶園肚飛上飛下，搞到暢若若仔。

「鷺姐婆惜外孫」！吾姆啊，捉一竇仿仔雞个雞健仔來畜，講畜分佢較熟水兜仔、藥性走較淨兜仔，愛分厥孫仔食哇。自家畜个雞仔，煲該雞湯斯還香哦！毋過，見擺刷雞仔，佢兩子哀都分奮命个雞仔、血漬漬仔个雞旺仔，嚇到眼呆呆仔、心肝嘍嘍跳；香个雞湯，斯還鼻得著雞仔个魂魄哦，仰吞得落！伸著該兩隻雞嫲就得著養老令了，畜到變老雞嫲。菜園肚个雞峙無頂，搭一隻瓠棚分雞仔抵涼，雞屎留起來好做肥料。兩隻雞仔都畜到老翹翹、精若若仔，臨暗仔兩個湊等就走毋見，飛過瓠棚，飛上崑頂，去茶園肚跳舞、唱歌仔、尋食、整治蟲蝶了。

頭擺，做細人仔時節，姐婆屋下个橫屋乜有一間大雞峙。有成時，上半夜歸雞峙仔嘢嘢啾啾，一屋下人都走去雞峙逐孤盲狗。幾下擺，雞峙門關到好雪雪仔，雞仔還係毋見忒，阿蠻仔怪奇。有一擺，雞峙又乒乒乒了，大家都起腳走，相賽愛看係麼个鬼怪。結果，一尾大嫲尾个臭青嫲，還吞等一粒雞卵，就分大家嚇到溜瀉，瀉到無魂無影。過成點鐘邊仔，換阿姊分佢嚇到鋸鋸滾，因為阿姊一入間房，就看著該尾蛇哥，因到厥架仔床个眠帳頂啦！

上隻月，對門阿姊个雞仔也毋見忒，還留幾下條雞毛分人譴。狗仔又先分人怪怨，搵到逐家人个狗仔都係嫌疑犯，狗仔乜毋歡喜。包尾，凶手分人尋著了，係山貓仔擎走个啦。山貓呢！臺灣个平地又看得著山貓了，還走去阿姊个雞峙鬧狗，慫係該譴？還係該暢？

作者：彭瑞珠

☆詞彙學習☆

- 【嘍嘍嘶嘶】vo` vo` se` se`：大吼大叫。 【臭青嫲】cu qiang ma`：臭青母。
 【暢若若仔】tiong na na e`：高興的樣子。 【溜瀉】bid xia：迅速逃離。
 【仿仔雞】fong e` gie`：仿土雞。 【鋸鋸滾】gi gi gun`：尖叫聲。
 【整治】zang` cii：捉弄，整治。 【山貓】san` meu：石虎。食肉目貓科動物，
 【好雪雪仔】ho` xied` xied` e`：十分理想、屬野生動物保育法列冊之珍貴稀有保育
 妥妥當當。 類。
 【鬧狗】nau gieu`：搗蛋。

☆文法學習☆

- 【該】ge / ga：那。「該」除了表示指示代詞之外，亦可作為表示語氣承接、轉折的連詞。
 例1：佢想愛食麵，該你斯呢？（我想要吃麵，那你呢？）
 例2：該你就照佢講个做，應該無問題啦！（那你就照他說的做，應該沒有問題啦！）